



Allanut ajunngitsuliorneq inuiaqatigiinnik kivitseqatigiinneq, utertitsiffigineqarnissamik akissarsinissamilluunniit siunertaqanngitsoq, inooriaatsitsinni annertunerujussuarmik ileqquliuiteqqittariaqarnerata qanoq iliornikkut aqqissuussamik piviusunngortinneqarsinnaanerata pillugu apeqquteqaat aallaavigalugu oqallinnissamik siunnersuut.

(Inatsisartunut Ilaasortaq Vivian Motzfeldt, Siumut)

Una oqallinnissamik Vivian Motzfeldtip siunnersuutaa susassareqatigiinnermik tunngaveqarpoq ujaruinertaqarlunilu. Soorlu aamma ilumoortoq qangarsuaaniilli susassareqatigiinnerup aqqani maani allat inuuffigisinnaanagu nalilertagaanni naggueqatigullu ukiuni tusintilikkaani avatangiisinut naleqqussarluta inuunikuugatta, sulilu najorlugu.

Ilumoorpoq ukiualunnguit kingumut qissimilaarutta inuit akornatsinni ileqqulersornigut allarlunnaanikuupput, tamannalu aamma taamani toqqammaveqarpoq angajoqqaatsinnik perorsarneqarnitsinnik.

Ineriartornerlu (ajorsiaratorneq, ineriartornermik taaneqarsinnaappat) sukkasimaqaaq, massakut angajoqqaat, suliffeqarunik, ulapittuupput ilarpassuulu inuuniapiloortuunertik peqqutigalugu killilimmik meeqqaminnik oqaaqqissaarinissamik perorsaanissaminnilluunniit nukissaqartaratic; inuunermi tulleriaarineq allaavoq, perorsaariaaseq allannornikuuvoq, pisinnaatitaaffippassuit avataaniit equssat atuuttussanngorartippagut, piorsarsimassuserput ilaatigut annertunerusumik qissimangaarnagu.

Taamaakkaluartorli tunngaviatigut suli tassa angajoqqaat akisussaaffigisariaqarpaat meeqqaminnik perorsaanerminni susassareqatigiinnerup pingaaruteqassusianik perorsaariaatsiminni ilaatitaqassallutik.

Isumaqataanartutulli aamma isigaarput siunnersuuteqartup eqqartormagu atuarfeqarfiit, ilinniarfiit aqutigalugit aamma immikkut susassareqatigiinneq – akisussaaqatigiinneq ilinniarfissutaassagaluarpat, tassuunalu utoqqaat illuannut meeqqerivinnut ilinniarnerninnut atatillugu qanilaarneq anersaaralugu, susassareqatigiinneq nukittorsarneqaaqqissangaluarpat.

Tassani ilaatigut immitsinnut aperisariaqarpugut suut naleqartitat tunngavigalugit ineriartortitsissaagut, suut piorsarsimassutsikkut, inuiattut ilisarnaatitta qangarsuaaniillu pigisagut attatiinnassuagut, “uummarsassavagut”.

Qangami piorsarsimassutitsinnut pingaarutillit annaangajannikuusagut arlaqarput utersaarfiginikuusagut, assersuutissaqqippoq qaannami inuiaat kalaallit atuinerat, tassuuna Partii Naleqqamiit oqarniarpugut – ajornanngilaq.

Ajornanngiinnarani pisariaqarpoq, taamaattumik siunnersuuteqartup sammisap pingaarutillip qaqitsineranik qujaffigisariaqarparput, ataatsimoorlutaalu aaqqiinissamik suliniuteqarluta, ilaatigut uani siunnersuummi aqutissatut naleqqiunneqartut periarfissatut ilaatillugit.

Qujanaq.